

三水縣志卷四

知縣朱廷模主修

陽湖孫星衍撰

壇廟寺觀墓七

明邠州志風雲雷雨壇在縣西門外北向楊豫建社稷壇在縣東門外劉儀建邑厲壇在縣東門外南向劉儀建

縣舊志風雲雷雨山川壇在東澗河西岸邑厲壇舊在東郊壬子林知縣捐俸改置西門外

右壇

明邠州志三水縣先師廟兩廡戟門楊豫建櫺星門泮池劉儀建啟聖祠在明倫堂後知縣張珩建敬一亭在明倫堂後劉儀建名宦祠在梓潼宮之後享祀三位魏恒州守韓褒宋三水縣尹李沐明知縣楊豫鄉賢祠與名宦祠并享祀五位漢第五倫

三水縣志卷四

唐同平章事第五琦宋丞相第五均度支員外轉運副使范祥資文閣太常少卿范育祭器嘉靖十九年知縣李時春置白鐵祭器二百件磁器一千件黃帳五付書籍四書大全一部二十本易經大全一部十一本書經大全一部十一本詩經大全一部十一本春秋大全一部十八本禮記大全一部十八本性理大全一部三十本孝順事實一本五倫書六十二本爲善陰隲一本醫方選要十二本漢唐通鑑品藻六本朝服祭圖一本博文通會四本聖駕重章大學錄一本忠靜冠服圖一本聖製燕弁冠服圖說一本聖諭一本御製正孔子祀典申記一本御製大符龍飛錄二本

縣舊志先師廟在明倫堂前枕廣原而環汎水自萬歷癸未改建歲久傾圯辛亥林知縣捐俸重修命諸生張僕等鳩工濬泮

池甲寅陽至落成先師大成殿七間東西廡各七間戟門三間櫺星門三座泮池一區太和門一座啟聖祠在先師殿左有敬一亭祭庫名宦祠鄉賢祠重修文廟碑在正殿之前學宮告成題咏碑在戟門左續修泮池碑在戟門右

文倬天重修文廟碑禹貢原隰之野是稱幽九原九隰而錯以成文則一經九緯之幽不以上接虛良蒼華之敦乎其地絡本於子午嶺自北以南者首乎乾以大成而峯峙連山之艮水遙歸藏之坤爲聖文之總萃其天文則應帝魁之一星而戴匡文昌六宮昏建華山以西爲攝提之所貞茲其發天地之房自夾皇遡過宜廣開文運以綿聖功歟故公劉陟岡而爲廬舟玉以臨邱嶽依京而定制酌匏以立君宗俾踏濟者造曹而式化其都紛輪困之氣允後世觀文作人之藪也

於是幽學之講堂當之柰歲遠宮圯鞠爲茂草而望素王之容者無起色我侯至自閩三異之政首重象璜諏吉而鳩工凡攻木飭材必于橐先倡之僉謀厥衆自庠師臬紳士量力以捐有差等辛亥之秋經始大成殿子來罔恃乎馨鼓及冬而載度其楹載華其棟冠雲榮繼不翅鳥革輦飛之翼翼也嗣壬子新兩廡而丹雘之矢棘正啟聖之祀殖噲肅敬一之亭有伉者置戟其闈門翼兩祠以宦以賢其中阿將將表以櫺星者應門也斲之礪之加密石焉而鳳之軒翔蛟之連蜷以雙標於左右輪奐之美廓蒙而昭發之甲寅又相中唐塏爽濬池以甃半天子之讎而泮之清流環璧采芹賡思樂之風公宮就陽樹槐開論義之市前五雉而坊經涂之軌者顏以太稊元氣其大道大德之表以歸靈光迺風水之渙享以

立廟之遺義乎我侯定中揆日而告成以三年都人士思鑿
功於不朽請倬天爲文國言曰雍州原隰底績卽公劉所度
之者其原可以行徹田之法其隰可以收流泉之利原陽而
隰陰陰陽各九交錯爲文應天地自然之易隆結於子午艮
山而坤水四時之所交風雨之所會幽實據隩區矣先王建
國制學叶三靈而敦五土惟制作定世符之時聖依之聖者
人祖倫之祖父葉萬所造命以玉燭成歲功聖其總一歲之
時也其四配可分當一時故復爲青陽宗爲朱明述爲白藏
亞爲元冥又閔以康解冉以泉動至子石之可年者當斗一
南六陽之侯駟赤輩之不可年者當日一南六陰之侯三千
其門庭而升堂通六藝者特七十二以當七十二侯乎揭聖
宗而翼天統以齊七政之玉衡不耑望崇儒論道我侯哉侯

曰漢太常之議謂三代崇化以風四方莫先於學春秋羽
夏絃冬誦太平之原也及唐咸亨五月造學以敬儒宋湖州
千人立教於安定或起璜宮或聚五徒采交州之磬繪城南
之圖國淳俗樸鏘被於道而六路咸秩遐哉其可風矣約
之椽之其有事於幽璜拓茅築垣始於困敦成於攝提有恤
之宮曼碩以若萬民諏所作者則林侯諱逢泰閩之晉江人
庠師王諱採陝之延川人泉幽之子衿王名相之王名光烈
許名桂張名僕也爰穹伐以鑿而銘之曰九原九隰合乎易
連山爲峯歸藏爲液子午之龍結磯脊陰陽錯文應采芹以
半璧誰作璜宮孔曼以碩我侯成功在攝格

明文在茲創修牲所泮池記蓋聞爲政有建置詎飾觀省哉
乃牲所泮池將明禋而廣游息咸藉乎此則尤典之不可缺

者故詩咏思樂書紀惟馨厥有旨也三水肇自成宏勅建聿備嗣是歲久頽壞人思興新遣令崇任堪輿家言遂移廟學於縣治之東南隅爰更行臺而爲之顧地僻狹隘漸就卑濕櫺星門外鑿池其南引流灌溉以瀦泮水已而萑葦叢生蒙士時取汲其下春秋享祀結棚於前以省宰牲牢哀鳴蹢躅殊非祇薦之地矣邑侯周清翁自蒞位以來迺慨然曰夫令者士之表而神之依也顧缺廢如斯奚以歆神而作士捐俸就工甃以磚石中通以橋甫踰月而竣事復規度于泮池之西構地一區廣袤胥數十武繚以垣墉宰牲於內庶觶觶可遠而昭薦致潔也神罔恫而士咸悅其在斯與然公之創置不寧惟是移黌門以飾輪奐新三汲以固局鑰整燕思以便裁決更迎賓以廣延訪葺明樓以達聲教至於公署吏廨罔不煥然諸凡營繕殫罄心力而民不知擾茲皆昭揭衆目而績莫揜者若夫綜理周密政教聿新自有口碑載道固無俟余之喋喋也公名克字仲美清泉其別號世爲古宋柘城人萬歷庚子孟冬之吉

縣人張僕續修泮池記三水之學宮自有明成化十六年重建邑始而泮池之遺址僅存巔末無徵世代更移鞠爲茂草焉幸我邑侯林父師以八閩雄才家學淵源承筍堤夫子之志於辛亥中秋慨議葺修凡尺木片石悉先請出諸清俸而紳士之捐各有等經營三載費約數百金不取民一粒而輪奐更新焉獨泮池未濬采藻無聞不幾九仞之簣與僕忝居門牆思續其事而始終之謀及同社咸欲助力寅夏諏吉濬厥舊址甫及泉而石碣出焉乃前庚子詞林文先生太青文

夫子創修泮壁之始末也越七十五年而又一新礮石爲底
甃砌以磚中通以橋庶乎思樂可咏而青珮得以觀光功竣
之餘議樹一坊而慮若不貲侯引爲已任仍捐十餘金棟宇
榱桷各如其合式于今城闕不刺而翠屏對峙爲文教地伊
誰之功嗚呼我侯崇聖尊賢之意固後先濟美矣而吾邑人
文之肇興其在斯乎僕末學小子監役三載幸無隕於厥命
而前輩之志亦賴以彰也因勒諸石以誌弗忘云康熙乙卯
夏五之吉

林逢泰長至日泮宮告成集諸生瞻拜詩并序余承乏幽土
見學宮傾圮愀然久之竊嘆世之事佛者招提蘭若不惜金
錢奔走如鶩至學宮榛蕪漠然置之殊不可解或云佞佛冀
其獲福多靈應也余笑荅以聖人道大固不待論卽如人讀

其書便能識字知義理不讀其書便不識字不知義理此豈
非至靈應者乎適王司訓至因令董其事與諸生謀共修葺
先捐微貲爲之倡一瓦一木不以累及民也幽土瘠苦寒或
屈於力或阻於時是以遲之三年迺竣厥功然此心歷三年
如一日其始末載在文俶明先生記中告成之日值南至集
諸生瞻拜禮成而紀以詩伏念先君子倡道筍堤特祀學宮
雖關閩異地而淵源相接故末語偶及之承諸紳士賡和酬
韻若有會於旦氣之旨益以見道南一脉嚶鳴不孤云詩云
人文千載蔚輪奐一朝新闢沼蒙泉動占星井埜陳飛葭融
九谷立雪重吾閩南望筍堤石遙含泮藻春

右先師廟

明邠州志城隍廟在縣治東楊豫建嘉靖中張珩增修

縣舊志城隍廟在東門內正殿五間饗殿五間川堂三間寢殿三間鐘鼓樓二座迎禧樓五間東西分司各七間萬神堂在左寧一宮在右角門二間大門三間明宏治邑尹馬宗仁張珩同縣人馬致遠相繼修建神像乙卯林知縣重塑其像乃明宣德三年造

明呂頌顯祐伯城隍廟記夫祀爲國事之大者若城隍廟祀護祐一方保障四境義兼神祇又祀事之大者也太祖高皇帝洪武三年正月詔定天下城隍府州縣有公侯伯之異稱而俱爲顯祐伯者蓋以鑒察斯民靈祇斯土也顯則威靈不著祐則福澤普施三水縣五代時或屬隴或屬耀元至正七年省入淳化縣屬鳳翔邠州明因之成化丁酉都御史余子俊馬文升奏復三水縣隸西安邠州宏治三年知縣馬宗仁

始創斯廟爰修祀典殿宇門垣遵詔旨以重民事者也宜曰三水縣顯祐伯城隍廟以都祀事也夫祀以備物齊禮爲豐禧也邑之鉅姓恩榮官馬致遠及子生員秉正知縣秉直自備銀粟鳩衆紀善喬濟民生員趙元卿等建立獻殿五楹以稱報賽之陳奠也時嘉靖十三年五月知縣廣漢張珩樂觀其成而獎勸焉馬致遠嘗邁疾夢城隍覺而愈欲崇神貺於無已也於三十六年遣二子詣羅中丞廷繡書城隍大扁飾以金碧供上之以彰神明之真境也知縣吳之翰嘉賞之於四十四年令道士化鐵鑄烟樓一座以爲香火之需大磬二口以爲啟叩之助儒學訓導郭聘有記以載其盛於隆慶二年見廟門直衝往來冒褻輸銀物共二十餘兩同馬化龍出銀十兩建磚樹塞一座以顯靈崇望殊爲壯觀也於五年見

司屬未備又同邑衆各輸銀木建東西司房一十四間具神職也於六年三月見各司神前香火離陸又置石鼎一十四供朝夕祀享也夫治神宇以完美延時歲而弗替前後樂輸一約千百計使廟貌嚴肅卒克祠祀嘉祺之美顧不善耶若恩榮官輩可謂至誠感神精誠不二者矣宜其享純嘏而綏神祉云隆慶壬申春二月予將入汴過其邑親覩其迹因述之而爲是記

右城隍廟

縣舊志關帝廟在城隍右

右關帝廟

明邠州志丞相祠在縣西十五里魏落邨祀漢唐宋第五倫三丞相小像存焉洪武十八年建

右丞相祠

明邠州志學士祠在縣西三十里大慈邨祀宋學士范祥父子
右學士祠

縣舊志扶蘇廟在石門山中世傳秦太子扶蘇授國典三物處死後成神人爲立廟廟下有湫禱雨立應

右扶蘇廟

縣舊志洪仁寺在青冑原唐時勅建

右唐洪仁寺

明邠州志淨土天王寺在縣南三十里宋建

縣舊志淨土天王寺宋淳化三年勅建有御製碣記

右宋淨土天王寺

明邠州志大像寺在縣東北一里

縣舊志大像寺金大定元年建

右金大像寺

明邠州志福延寺在縣東北五十五大定三年建

縣舊志福延寺阡周二十畝大定勅差侍郎阿典建內有古松

右金福延寺

明邠州志龍巖寺在縣東南四十里大定五年建

縣舊志龍巖寺金大定五年耶律監造遺阡宏敞

右金龍巖寺

明邠州志莊嚴寺在縣東五十里元建

縣舊志莊嚴寺在前泥陽邨大元七年勅差中書省右丞周德

建

右元福延寺

明邠州志堡嶺寺在縣東三十里堡嶺山頂流人多避兵于此

縣舊志堡嶺寺元人勅建有高僧超公延安人卓錫於茲寺閉

關焚修八十年所一日沐浴合掌書偈貽弟曰八十年來如製

電臨行與汝通一綫形骸脫落如金蟬一性圓明空裏見四海

無居似片雲十方世界遊履轉遊履轉見不見倒騎泥牛入祖

殿書畢涅槃今遺龕存焉

右元堡嶺寺

邠州志無功寺在縣東七十里鑿石爲邨長五丈闊三丈有石

室

縣舊志悟空寺俗譌爲無功寺可以避兵

明文毓鳳再經悟空寺詩云當年三笑處此日又重登碑落

蟲爲字堂虛鶴是僧有泉堪振錫無偈問傳燈煜煜青蓮色

支公見未曾

右悟空寺

縣舊志寶塔寺在秦塔之陰時有高僧托足舊址頗廣相傳爲唐時大刹經火無存天啟六年縣人文疏鳳同諸生王遂昌張心昌等相地鳩工建殿五楹莊嚴佛像康熙丁未邑衆又建大悲佛母堂三間地藏殿一座

右寶塔寺

明邠州志大塔在縣前七汲浮圖一邑勝觀

縣舊志秦塔在城東北隅高十五丈其陰建寶塔寺舊志載唐吐蕃入寇塔經火焚積久損傷塔遂東斜萬歷閒縣人文運開葺之順治甲午六月十日地震仍端正如初辛亥舊屯廳沈光禧聞其勝槩捐資築垣邑人庶因重修焉

右大塔

明邠州志小塔在寶峯寺前

右小塔

縣舊志金泉寺在半川府東以金沙獲名中有古松

右金泉寺

明邠州志寶峯院在縣西溫涼河上唐建

縣舊志寶峯院唐太和三年建

右唐寶峯院

明邠州志棲雲觀在縣東北職田鎮宋建

右宋棲雲觀

明邠州志三清觀在縣西三十里郭邨宋建外有常信地百畝

右宋三清觀

縣舊志惠濟院在兩平邨金大定三年勅建

右金惠濟院

明邠州志玉泉觀在縣東

縣舊志玉泉觀在玉泉右故名內有古柏

明劉翀遊玉泉觀詩云玉泉觀裏柏森森培養靈根異鄧林
甘露點珠多麗澤暖風吹雨挹晴陰霜枝峻絕朝華老勁節
孤高晚翠深日見棟梁成大用掄材端擬重南金

右玉泉觀

縣舊志洪福院在縣南十五里

右洪福院

賈志秦扶蘇二女墓在縣東北六十里

縣舊志兩女砦去縣七十里麓有兩冢存焉舊傳秦扶蘇二女

葬于此

右秦扶蘇二女墓

明邠州志侯君集墓在縣東北雞阜山巔

右唐侯君集墓

縣舊志馬沼墓在縣東北十里其堡頭誌石因崩而出居人毀
之

右馬沼墓

縣舊志宋范祥范育墓俱在縣南原太慈邨二冢相望舊碑巋
然

右宋范祥及子育墓

明邠州志第五倫墓在縣西南三十里蒲東舍碑存文落

縣舊志第五均墓在縣西三十里蒲東舍之間按第五氏墓表

云先世出齊田橫之後田徙園陵者多故以次第爲氏舊雲陽靖川人後徙三水子孫因以爲家焉

通志按邠州志云第五倫墓非也倫墓在涇陽

右宋第五均墓

縣舊志五女冢與第五氏墓相比元祐閒碑文在其冢內

右五女冢

賈志文御史振賈在縣北半川

縣舊志在半川之東南二里左側有孝子少蒼廬墓遺跡存焉

右明文振墓

賈志文在中墓在半川文林

縣舊志文少白墳在縣北南宮之文林左環白石嶺右羅東澗

河

右明文在中墓

賈志文運熙墓在南宮

縣志在半川之東南二里

右明文運熙墓

賈志文在茲墓在縣北雞紅嶺下耐父運開側

右明文在茲墓

賈志文毓鳳墓在縣西二里

右明文毓鳳墓

縣志劉偁墓在縣西蒲泉舍康熙十年奉

勅諭祭葬建坐立碑以旌忠節

右劉偁墓

三水縣志卷四終